

太華山人集

亭

太華山人集卷二

長安何棟著

記

西安府題名記



今天下凡言重地皆歸之關中蓋以周秦漢唐之故
都古以京兆尹領之

國朝改爲西安府領州六而縣五倍之袁延二千餘
里地大事殷職專位重

朝廷慎選才賢使主府事而前後諸君來守是郡著
勲績被顯庸聲望相續時稱得人嘉靖乙巳寧陽吳

君居守之三年也歷觀往蹟上考前哲世次遠近政
治淺深逖矣不可識矣乃稽之籍牒詢之父老彙次
姓氏欲勒之石以昭往烈以詔後人寓勸戒之義焉
乃屬余爲記粵維西安實古京兆盛美之稱固無與
倫夫何近年以來宗藩分封王祿若丘四鎮征戍軍
需若流土地之膏腴日縮人民之賦役歲增加以天
道之荒歉相仍軍民之貧苦爲甚府事之難爲也久
矣

朝廷軫念爲之設官懼其才之弗稱也博求俊彥精
拔循良以授之又懼其心之或怠也寵之重職養之
厚祿以感之凡此皆以爲民也而民今若此况前病
民之事又不獲已焉甚矣府事之難也當是責者宜
蚤夜以思凡所以綏輯安養保愛生息之道逐端隨
緒盡吾心力其節財省役緩刑薄賦毋事虛文務臻
實効不待他求考之於石有足徵焉如青神余公子
俊畢之秦公紘二公蒞政逮今百年邈乎聲容之不
相及而秦人無大小無遠近油油然思之立祠瞻禮
歲時奉祀儼若明神其善政仁心可考見矣他如昔
節自勵仁恕宜民才堪集事力可服奸人各有長俱
能善治又間有不自檢飭自陷自畫亦昭然具在也

後之君子臨政之暇締觀諸石欲附其名見其善者
欣欣焉思所以齊之見其否者惴惴然恐其或蹈焉
貞哉斯石有勸戒砥礪之道誠有位者之監也豈徒
名氏爵里而已哉

鳳翔府重修文廟學宮記

鳳翔在陝西外隣四鎮內聯三輔維昔周秦漢唐盛
時逮我明成化弘治間時和歲稔內熙外寧民物阜
康人材輩出寔西北之重郡文物之奧區也爰及近
時虜患頻仍宗枝繁衍民困於徵輸兵疲於調遣
事謝往昔時浸衰弊嘉靖乙卯季冬秦晉之交地

忽大震表延千里搖撼震盪川原坼裂郊墟遷移壅
爲固阜陷作溝渠山鳴谷響水涌沙溢城垣廟宇官
衙民廬傾頽摧圮十居其半軍民被害者蓋千萬計
也迴視曩昔之盛漸盡無幾矣

朝廷憂之下詔修省遣官祭告重爲地方擇人乃陞
才御史懷慶劉涇來守鳳翔越丙辰夏六月蒞任日
擊天變身履時艱矜此遺民露次失所喁喁嗷嗷無
所依怙乃蹙然嘆曰此天地希有之變古今未聞之
災也存撫安戢舍我守臣誰其職歟諸凡崩墜俱宜
圖畫然化源在孔廟政本在學宮蓋是先之乃申呈

巡撫都御史滇南唐時英巡按御史蘭溪鄭本立四
明楊美益得允修復時維方伯東阿殷學漢州周滿
祥符李養憲長德州王汝楫叅政鄭州謝淮長治趙
希夔副使南充王養浩濟寧靳學顏歷城李攀龍分
守臨朐遲鳳翔分巡石首高尚志咸贊成之於是鳩
工掄材應役分寄同知李良能周夢綵通判李家傳
推官孫漸知縣康一元先後供事廟貌聿成士習不
變俎豆式陳琴瑟在列士子橫經縉紳談藝冠帶整
肅雅頌和鳴端本澄源王道伊始不圖今日文物再
復亦彷彿往昔矣粵惟先達職司民牧每以匹夫匹

婦有不被堯舜之澤若已推而納之溝中其自任如
此之重行一不義殺一不辜而得天下弗爲其自守
如是之嚴蓋由委任之隆行不枉道權力之專制皆
由心相須以成事功自倍非如今時邊未休兵軍需
日迫民多厚斂王祿歲增物力已困催科愈急百凡
病民之事司牧者不得自已也徒羨古人莫救今弊
然寬一分則民受一分轉移之機有同呼吸噓之即
溫吸之即寒是又在于司牧者極力經畫悉心撫恤
必使庠序之教足濟閭閻之艱絃歌之聲足救呻吟
之苦久道化成則禮樂可興而循良有傳矣監司守

令其念之哉其念之哉

長安縣儒學科舉題名記

大明洪武庚戌我

太祖高皇帝始開科取士詔曰朕統一中國慮官非其人恐傷吾民自今年八月爲始特設科舉以取懷材抱德之士務在經明行修名實相稱其中選者任之以官使中外文武皆由科舉而選非科舉毋得與官以稱朕責實求賢之意由是天下士子彬彬向學實才輩出矣我關中地居上游河嶽靈異爲周秦漢唐故都長安乃首邑也自洪武十七年甲子科至今

一百八十餘年幾六十餘科士之登薦或箕裘濟美或棠棣聯芳後先相望科不乏人昔之司學者常輯其名氏於明倫堂東壁嘉靖乙卯地震壁傾恐久湮廢余與少府韓子詢都諫王子鶴及舉人張車師道立乃礮石登叙樹之堂東以圖永久時維督學憲使尚君維持方以實學責士維爾諸士朝夕游焉視諸名氏實惟先達其勲業文章顯於世者甚多皆實才也蚤夜企仰務求實學毋事虛僞以徼近利庶不負我

聖祖求才之實意則此石不爲無益矣况昭往哲勸

後學又不可泯乎

詞

代贈吳六泉太守帳詞

三輔河山不改唐漢秦周之盛一方京兆實兼君臣
父母之權簡用名儒本經術以立治典司大郡叅禮
法以齊人故膠東有璽書之旌潁川受封侯之賞况
此關中之重地寔控天下之上游苟非弘濟之才難
任父師之責恭惟

六泉先生大人門下甲科真才明時偉器鳴琴花縣
已沾仁愛之初心執簡秋曹久著廉平之善政持公

遭滯備歷年勞錄舊掄才馴登顯要茲惟分陝之首
郡授及濟時之英賢秉鑑持衡才實天授握冰茹蘖
清恐人知功最列藩榮殊他郡屢承臺薦簡在
帝心敷大惠已遍於三秦展嘉猷將及於四海某等
忝列近屬恭睹休光懷仰德儀真爲宗主感服政教
莫罄揄揚謹製蕪詞用彰弘美詞曰

鈴閣春閒戟枝日午槐陰徐轉黃堂古稱京兆尊重
異殊方喜看雙旌五馬照青春紫綬金章風日靜蒲
鞭不用真是古循良見如今關中遺愛海右傳芳恩
同雨露行比冰霜屢見臺臣交薦盡道是卓魯龔黃

二千石入爲宰相早晚侍

君王

右調滿庭芳

代贈王豫齋邑侯帳詞

伏以

社稷人民典重周官之侯度終南渭水邑臨秦地之
上游華轂朱輪維今令尹銅章墨綬實古諸侯恭惟
大邑侯豫齋王大人門下純心實學清節竒才蚤歲
發科次年連第千尋王海神龍高躍於雲衢萬仞瑤
山祥鳳朝鳴於霄漢欲養其相才之諳達先試以民

事之艱難借子賤以專城屈望之於三輔桑間雉馴
魯恭之治已成海上珠還孟嘗之清可表閉閣每同
於延壽催科豈拙於陽城百里敷安民之政租庸調
不擾閭閻三事備守職之賢清慎勤獨超列郡愛民
如子治邑如家臺臣褒薦甲於三秦父老稱揚出於
萬口握水茹蘖真三代之遺清卧轍攀轅誠一方之
遺愛三年奏績注上考於天曹百姓去思留芳名於
西陝俯棠陰而扳留莫逮睹麥秀而瞻戀不忘爰綴
蕪詞用彰休烈詞曰
青門送別正樞火纔燃柳煙初結遠近傳呼三秦父

老爭卧君侯車轍無愧龔黃卓魯還見臯夔稷契羨
數載政簡民安冰清玉潔豪傑看今番奏績

朝廷考最居前列豸府掄材諫垣拔雋銅印又看生
鐵當代第一循吏早晚召歸

金闕建勲業作

天子股肱朝廷喉舌

右調喜遷鶯

墓誌

明山東按察司副使前溪張君墓誌銘

嘉靖丁未秋七月癸酉憲副張君卒於家其友人介

石韓君侯鉞彙次其行實成狀其子維禎詣予泣而
請銘君與予同里閉從游且久乃弗能辭而為之銘
按張氏世為陝西西安右護衛人曾祖興祖福俱隱
居不仕父傑以君貴歷贈奉政大夫戶部郎中母汪
氏封安人贈宜人生兄鉞為太醫院鑿官君即次也
君名環字孟循別號前溪生有異質幼學不倦中嘉
靖乙酉鄉試越己丑登進士第丁外艱哀毀弗堪服
闋授戶部貴州司主事癸巳冬適大同弗靖
廷命進討各鎮出師君以才力推薦督運邊儲軍需
不匱僉謂君功陞本司員外郎繼陞淞江司署郎中

時大司徒儉庵梁公材方嚴部政諸司惴惴奉職君臨事抗議不諂不撓梁公獨心許之戊戌春陞山西潞安府知府潞為新創百凡弗給君乃勵官守嚴法制未數月政乃大行聲聞益著銓部聞其才乃推調太原府太原為省郡政不由已行皆掣肘任餘二載事多抗忤雖耻折腰適憎多口復又調四川夔州府夔之政大率如潞如太原又越三載乃陞山東按察司副使未登任或有尼之者遂乃懸車焉君純誠敦厚與物無競且長髯修眉雙眸炯炯人見之皆以為遐壽之徵而今乃不延豈造物者有所忌耶惜矣惜

矣君生於弘治壬子夏四月距丁未壽纔五十有六配王氏西安前衛壽官政之女封安人先嘉靖己亥卒於京署贈宜人生子一維旂早夭女一適府庠生周榮祖今大同總兵官周尚文應襲孫也貳室杜氏生子二維旗府庠生維旌亦夫女二李氏生子一維旃甫二歲女一維旗娶潘氏本衛義士紳之女維旌娶鄭氏西安前衛指揮養民之女卜次年戊申三月甲申協吉合王室人而葬焉銘曰嗟嗟前溪少華多實荐登科第累試華職歷推才賢懋著勞動出守三府政若畫一誰毀誰譽或軒或輕公論暫昭佐齊憲

秩將究所施止或人為使此聲華偃息泉石如何數
厄求闕玄室有子嗣業行履可述光泰重岡終焉永吉
明通議大夫都察院右副都御史可泉胡公墓

志銘

公諱績宗初字孝思後更世甫秦人也號可泉亦號
烏鼠山人穎悟夙成蚤歲以春秋為邑學生提學遂
菴楊公虎谷王公咸愛重之中陝西辛酉鄉試繼登
正德戊辰呂柟榜進士三甲第一人會有執政子亦
登二甲第一人欲覬翰林清職乃倚中官劉瑾勢以
二甲三甲各第一人因傳臚俱授翰林院檢討仍取

二甲邵銳黃芳等五人三甲李志學等三人俱授庶
吉士實假衆市公也公辭職不獲乃受

命與修撰呂公編修景公叅對

孝宗實錄錄成蒙

賜金幣加俸一級庚午執政者以瑾敗其子編管為
民乃註公與邵公黃公等俱外補公補四川嘉定州
判官歷二載陞潼川州知州俱有惠政乙亥陞南京
戶部湖廣司員外郎己卯陞吏部驗封司郎中以考
績得封父母如其官並妻各

誥封贈為宜人未幾陞安慶府知府時值逆濠兵後

民皆竄去又

武皇駐蹕留都供御繁劇朝議以公秦人有經畧雋才特簡公以守刻期履任時夏旱秋澇公修火政舉荒政上下又安明年癸未江南大旱歲飢民流復

詔公移守姑蘇公以姑蘇鉅郡財賦益夥法制益難經理庶務尤詳於治皖會

詔守令久任公任兩郡幾九載久道化成禮讓興行擬古循良當不多讓陞山東布政司左叅政及去任兩郡士民皆建祠奉祀樹碑頌德思如父母不忘也將移浙藩又改晉省以平盜功蒙

賜金幣辛卯陞本司右布政使壬辰丁外艱制滿復除河南右布政使時鄆陵盜起公討平之亦得賜以金幣丙申轉本司左布政使冬陞都察院右副都御史巡撫山東地方時魯府恣惡公抗疏以聞得遣廷臣會勘

詔奪其祿革其護衛地方藉以寧謐繼以原職改總理河道經畫河防利弊丁酉以九廟成奉

詔進通議大夫得進封贈其祖父母父母及妻如其官已亥以

皇太子立復奉

詔得廢一子入監讀書既

乘輿南狩公迎於磁乃復改巡撫河南時

車駕經過公經理周悉事竣復蒙

賜以金幣汴中大飢復大疫公上疏請賑情詞激烈
同事者覽而難馬公曰豈得念吾屬而坐使弊中州
數百萬之生靈哉脫有咎某請任之疏上得發帑銀
二十萬兩

命大臣賑貸之汴民少蘇焉己亥冬汴中薄城內外
火燎頻發未幾行臺亦被災公引咎乞歸因得

賜閒田里爰築別墅以居日閉閣著書手未嘗廢卷

帙於諸理亂黜陟不相聞時或乘籃輿課耕隴畝亦
或登高賦詩興盡乃返與邑中諸薦紳讌會作九逸
圖時有巨惡欲脫罪乃誣公被逮賴

聖明洞察寬釋得優游卒老庚申九月三日方執簡
對賓倏忽告逝據生成化庚子十二月二十六日至
卒之日享壽八十一歲其次子被具狀以予與可泉
相知頗深請銘予按狀公高祖鈞始居秦曾祖海祖
南皮尹璉贈都察院右副都御史祖母贈淑人父教
諭士濟進都察院右副都御史母李氏進贈淑人繼
母趙氏進封太淑人妻王氏進贈淑人繼室趙氏其

世系官履行實悉載本志茲不復贅公七歲李淑人卒於京公事繼母趙太淑人曲盡孝養始終無間且才氣英發對客揮毫詩賦立就宛若宿構然雋爽豪遊上追古人凡海內賢達及藝文之士望形影從聆聲響赴欣欣納交而飢餒詭隨之徒未免含嫉睨視焉雖台席屢滯不究厥施而功實詞華流傳遠邇雖百世不泯也有辛巳集丙辰集各四卷烏鼠山人小集八卷擬漢樂府二卷擬西涯擬古樂府家譜各一卷安慶志三十卷秦安志二卷鞏郡記三十卷秦州志二十卷春秋本義十二卷並彙選唐雅雍音等篇

皆已行於世其河高歸田諸集未梓者尚多子男二初淑人王出以廕授通政司知事娶馬氏次被趙出中丙午鄉薦娶馬氏孫男二蔭縣學生初子娶周氏鵠尚幼未聘孫女三長歸隴州國子生閻錕子司讚餘俱幼俱被子女卜辛酉十二月六日葬公邑南祖塋之次乃爲之銘銘曰

於維先生性篤孝成弘才博識早歲蜚聲峻登科第翰苑題名玉堂視草象瑄流馨瓠大招訾璞隱難知久借寇恂暫屈望之德政既洽循良可期祠留遺像碑表去思再歷藩翰盡力驅馳三撫大鎮益懋忠蓋

台席方升田祿作舉遂賦歸來著書自信壽登耄耄
順時歸盡發祥衍慶昭茲後胤

明資政大夫戶部尚書西陂劉公墓誌銘

公諱儲秀字士奇別號西陂姓劉氏世爲陝西咸寧
縣人祖銘以公貴贈通奉大夫浙江布政使司右布
政使祖母路氏贈夫人父檜封承德郎刑部廣東司
主事加封通奉大夫浙江布政使司右布政使母李
氏贈安人加贈夫人於成化癸卯六月十七日生公
於尚書坊弱冠舉弘治甲子科繼登正德甲戌進士
第授刑部主事考稱授七品封贈陞湖廣司郎中奉

勅四川祥刑平反寔多嘉靖甲申出守鎮江府政教
清簡不肅而成戊子陞山西按察司副使奉

敕提督學政正身敷教多士彬彬有古風焉庚寅陞
河南布政使司左叅政俄以前提學時文移之誤罷
歸丙申

召起復叅楚政未幾陞江西總憲再陞浙江右轄遇
廟恩授二品封贈庚子由楚之左轄陞都察院右副
都御史奉

敕巡撫遼東兼理軍務時遼鎮屢經兵變上下驚疑
公至鎮罷遣峻防蠲除苛政布誠推恕務在宜人持

憲修戎慎於保境辛丑虜酋西寇錦義東犯開原公督率將士戮力破虜斬獲數多二次奏捷蒙

恩賜白金五十兩彩段四表裏陞戶部右侍郎未聞月遭父喪守制援軍功例蒙

恩賜祭葬服闋乙巳起授前職繼改兵部右侍郎丙午陞吏部左侍郎三載考績又蒙

恩賜羊酒例應廕子值嗣子屢亡尚虛

成命丁未陞戶部尚書總督倉場督理西苑農事光祿寺日給殺饌戊申初春陞兵部尚書例應具疏辭讓公疏辭過激

聖心弗愜罷歸田里乃於城東金華落修別墅倣古洛社偕同時致政諸老迭爲賓主歌詠倡酬公詩律最精酒量頗洪銜盃長吟徜徉十載擬終身焉有西陂集四卷行世辛亥六月公元配呂夫人卒夫人先封安人加封夫人生女子數人咸早夭甲寅四月貳室王氏卒其母儀婦行相夫克家俱載公自譔各墓誌中丁巳六月暑熱感疾念宗嗣未立告之臺史載請郡牧禮迎族姪劉光裕爲嗣子入繼大宗仍出俸資白金五百餘兩分給宗人及母族妻族延至戊午仲冬十二日疾篤乃召子與司徒盧書庵冢宰王三

渠夫尹費交谷及其壻舉人張車至榻前伏枕告曰
某本寒儒又叨重任自念生平未敢欺天未敢病
國未敢害民顧性行愚直疏辭錯謬待罪田里有負
國恩尚思圖報今則已矣無可爲矣幸得甲子七十
六已云壽美顧宗祧事重深用疚心雖生有五女竟
未存一男王氏李氏孟氏各有所生義無他適承嗣
子尚在髫年當事之如母有敝廬足庇風雨薄田足
供饘粥但使宗祧有主時祀不廢吾目瞑矣惟諸公
籌之泣下須臾逝矣衆相向長泣舉歛如禮以予與
公相知最深乃徵銘焉公世系具前女五人長配張

主政子車舉人二配廬司徒子洪楚三配費大尹子
炫俱府庠生四配王家宰第用卿子昌壽五聘予次
子瑛官生卜已未季冬初六日權厝於

救修龍首原新阡公生有竒姿眉目如畫穎悟根於
夙因學業成於蚤歲氣清質粹玉潤珠明見之者無
弗愛敬繼入仕籍屢踐藩臬薦登臺省敷歷中外幾
五十年溫良之德和而不流汪洋之度犯而不較與
少湖徐公並稱二妙乃於不諱之

朝再罹辭語之累是得於已者常盈而制於命者常
虛也世每惜之予何忍銘公又不能不爲之辭也

銘曰維公之進才德為媒維公之退辭語為災倏爾
鵲起踐斗履台忽焉蟻屈賦詩銜孟用舍有時無平
不陂公鬱弗伸弗究厥施

皇仁無私恩命可期龍首新阡仍豎豐碑

明鄉進士二川孟先生墓誌銘

二川孟先生名彥字士美乃誥贈戶科給事中祥之
次子也先世為鳳陽人

國初高祖君實官於陝西慶陽至曾祖仕廉始徙西
安占籍咸寧祖興善治生買田光泰里橋梓庄因家
焉父祥成化間宦遊於蜀壬寅歲 月乃生先生與

兄竒勵志向學文藝俱美並有時名後與予同試鄉
闈予始識先生見其修軀隆準議論豪邁遂納交焉
繼正德癸酉復同予俱登鄉薦數試京闈竟違初志
時兄竒已登進士授戶科給事中先生乃浩然自歸
曰人生貴適意吾父母俱以兄貴受

恩命贈如其官吾志願畢矣名者實之賓吾何為栖
栖求之不置無乃勞乎遂築室漣灞之間因以二川
自號乃閉關誦讀尚友古人博極群書尤精醫藥嘉
靖庚申三月 日以疾終享年七十有八可謂
壽矣元配于氏處士于伯通女相夫克家綽有賢聲

先先生卒子三允新善賈允宣力學允升明農俱能繼業不幸俱早卒孫男

卜次年辛酉正月

二十四日同元配合葬

里之新阡予每念同榜

若在菴施廷言江野倪公獻及先生名列鄉薦仕進有期皆守道弗屈終身不仕其大節篤行雖梅福之高潔尚平之曠夷不是過也世之躁進者可無少息其競心乎銘曰

於維先生穎慧夙成才堪副志鄉薦明經抱器未售耻於自鳴歛之退藏處困而亨蟻屈道妙蟬蛻世營惜哉玉樹閔此佳城

明戶科左給事中孟公配

敕封孺人高氏墓誌銘

孺人高氏乃余友戶科左司諫魯峪孟公之元配也司諫沒後九年爲嘉靖庚申九月初三日卒壽登八十有三其子允莊持狀請余銘其墓余與公相知頗深義不能辭按狀孺人系出臨潼縣虹坑高氏世稱巨族父德隱德弗耀生孺人於成化戊戌三月二十七日及笄擇配乃歸孟氏輔公勵志力學中弘治辛酉科鄉舉繼登正德甲戌進士初授行人司行人歷陞戶科左給事中適遇嘉靖改元公與科中邵天賚

邢伯宇正色立朝同心比義朝夕抗疏革弊政宣新
化凡中興初政裨助功多孺人亦蒙

恩例授

敕封焉公忠直不屈抗論獨多孺人愛之每勸以高
明柔克之義公秉性不回遂陷危機無何謫官猶賴
公道尚明人心未死復歷陞四川順慶府知府三載
政成孺人迺曰人生五馬貴是矣况耳順之年乎公
乃浩然告歸同孺人郊居玄灞北橋梓庄明農訓子
未嘗輕入城府公同母弟三人孺人勸公為置產業
豐裕頗同孺人生長男允莊復勸公再納副室李氏

鄭氏李氏男子五允喬允執允孚允修允若鄭生女
一允公之弟姓子孫無慮數十人皆感恩戴德忻忻
悅愉內外無間言是孺人逮下之仁睦親之義宜其
慶溢子姓壽登耄耋足為世之姪婦覆宗讒婦離親
之戒是可為誌為銘也孟之世系及其子弟婚娶已
備載左司諫之誌茲不重贅卜今十二月十一日開
司諫之壙而合葬焉公位終二千石乃稱司諫者以
公在科之忠節天下高之故世稱孟司諫云銘曰
於維孺人和順溫良克相其夫聲譽彌彰載衍餘慶
後裔斯昌九原有知百世允臧

明文林郎寧陵尹交谷費公墓誌銘

授狀公諱槃字伯甘幼歲歲歲修於終南山之交谷因以為號世為直隸鳳陽府定遠縣人始祖愚以開國功授燕府王相歿追封汝南王長子肅封崇信伯次子義即公高祖授前軍都督府都督僉事生二子長瑾次玘瑾授陝西都司都指揮使歿子孫襲西安左衛指揮使因家焉玘即公曾祖玘生銳銳生濟乃公父也為太學生母曹氏無出次母朱氏生二子長森次即公公生於成化甲辰二月二十日時父為太學生卒於京邸公方六歲也母兄撫育成立幼即聰

敏英發為西安府學生戊子舉於鄉屢試禮闈不第戊戌歲授河南寧陵縣大尹寧陵瀕河河水泛溢縣為巨浸公開渠疏水由地中行人得平土而居己亥歲

聖駕南狩至衛輝府火驚

行宮撫按司府俱被逮時內外侍御食廩六軍行糧皆委公取辦百九俱濟賢勞王事績列上等庚子河南復歲饑人相食公議賑以貸孤貧設粥以飼流移無祥符二縣之民賴以全活者甚衆兩被綵段羊酒旌獎人皆榮之至於均徭平賦扶弱鋤強振士風表

節義又其餘事也歷任數載憂

國憂民任勞任怨屢經撫按各疏才行交薦於朝時
銓司方將擢用公喟然歎曰愚生於成化甲辰今復
值嘉靖甲辰歲序再更勉強從仕可無已乎乃浩然
告歸構草堂於交谷事兄交友樂山觀水鶴髮童顏
二十餘年奄於乙丑歲九月十日無疾而逝壽登八
十有二可謂五福兼備者矣元配張氏護衛百戶圍
女繼娶張氏李氏錢氏俱先公卒載前志羅氏今存
男三炯引禮舍人張出娶孫千戶文女卒繼娶王百
戶卿女卒娶周氏卒娶韓氏卒美李出娶袁指揮寧

女卒繼娶張千戶麟女炫錢出府庠生娶劉尚書西
陂公女女四一適庠生田鏞一適張百戶斌一適引
禮舍人沈朴一適太學生石珮孫男四塚娶張僉事
五臺女美出莊娶孫守備賢女塚聘何指揮巨卿女
塚聘陳千戶紀女孫女四一適百戶朱宗周一適宗
室秉柳一適儒士徐煌俱炯出一未字美出曾孫女
一塚出卜今歲丙寅歸窆於神峪新阡銘曰
維公之靈交谷之精心宇光明才氣老成其止其行
惟時是從其死其生既壽且寧八旬遐齡五福是膺
神峪佳城永藏斯銘

明誥封南城兵馬指揮圭峯林君墓誌銘

君諱淮字朝東別號圭峯世爲浙江錢塘縣人

國初始祖茂高祖玉曾祖叢俱以金吾左衛指揮使陞將官沒於王事祖盛嗣職爲大同前衛指揮使歷陞陝西都司都指揮使掌印時當正統景泰間虜患方殷以軍功陞右軍都督府都督僉事奉

勅克副總兵鎮守寧夏年老乞休以母葬陝西遂留居陝省生子九人長子英襲授直隸懿城衛指揮使次子蕙配楊氏生子三人長澄仲治季即君也公生於成化十八年壬寅七月修軀長髯端慎誠懇幼而

業儒與都御史曹德芳管汝濟同受業於中書吉先生之門早有盛名配張氏前衛千戶張鑑女也方嚴勤儉克相其夫生女一賢明仁恕選配

秦定王冊封繼妃遵例

奏封君南城兵馬指揮

嗣國主時加禮敬君亦謙謹循禮不違矩度每與余及曹管二中丞雅會終日始終不怠德器純厚人稱長者側室盧氏孟氏王氏生三子俱早夭嘉靖庚申秋乃遘疾

妃號痛哀泣偕

嗣國主詣其第親視君疾嗟已危矣乃以其兄澄之
次子承宗繼其嗣越九月初二日 時終於正寢享
壽七十有九君蚤歲讀書鬱而未仕篤生賢女克配
賢王受官於

朝受祿於國田園之樂逍遙優裕子孫百世永受
國恩榮壽並全世之所難卜次年辛酉正月十二日
祔葬曲江祖塋之次乃爲銘曰

維公抱才鬱而未伸姻連

宗國寵列王臣受祿豐厚貽爾後人曲江崇壠百世
如新

明敕封安人龐母魏氏墓志銘

敕封龐安人乃儒林郎裕州同知脩菴龐君之元配
也姓魏氏父釗爲咸寧人母胡氏生安人於成化辛
卯九月蚤歲歸脩菴君時龐氏亦爲咸寧巨族祖政
善治生積穀甚豐父文秀母徐氏於成化戊子十二
月生君穎敏岐嶷幼習舉子業力學甚苦安人相之
晝夜匪懈時稱才士鄉舉累不第以例補太學生正
德庚午爲親而仕授四川合州同知兼署銅梁縣時
蜀盜充斥郡邑被害君乃多方守禦一城俱安軍門
大臣深倚重之無何以父喪歸制滿補任山西解州

同知兼攝芮城縣治迹無愧於前任滿考最遇
恩例進君階儒林郎贈君父如其官母徐封太安人
魏封安人改授河南裕州同知居三年安人乃勸君
曰官久幸無過舉父母又蒙

恩榮臣子之道盡矣况母老寧無鄉土之思邪乃即
日解官歸秦事親課子力田明農士夫交遊車馬填
門關中稱厚德吉人君夫婦無愧焉君歷任三州兼
攝二縣進而知止壽考而終雖君明敏之才過人亦
安人匡弼之功居多矣安人女行婦道母儀始終無
忝若逮下之仁敦族之義言不能悉也先嘉靖辛卯

二月君卒以癸巳葬祖阡壽六十四己未二月安人
亦卒享年八十有九可謂壽矣側室趙氏臨漳尹士
良之女也亦勤內政二月內相繼而沒得壽七十以
今辛酉歲三月十二日啓君墳遷於鮑陂原之新阡
合葬焉子男一材藍田縣學生先娶王氏繼狄氏女
二長適臨潼縣貢士賀晉明次即適予長子錦衣衛
指揮同知何琦孫男一繼元習舉子業娶王氏狄出
孫女七一適邵陽王府奉國將軍惟炳一適咸寧生
員邢光言一適保安王府鎮國將軍惟燧俱王氏出
一適西安府學生于標一適咸寧李權一字咸寧縣

學生徐相一尚幼未字俱狄出銘曰
吁嗟安人嚴亦寬止儉靡逐陋豐不殫侈訓子相夫
含章通理真哉玄石式勒素履

明秦藩宗室人山公墓誌銘

人山公者麟軒翁公鏗仲子也上溯其源蓋自

太祖開天御極分建親藩維

愍祖王肇封秦國支派蕃衍而

安定王乃其曾祖也母太夫人王氏正德丙寅六月
二十二日生公請名于

朝賜名誠漪因其性之所嗜自號人山少聰敏讀書

樂善及長習賈洞知盈虛歛散之宜倣計然之術賤
取如珠玉貴出如糞土故積居貿易家業豐盛雖處
隆貴而自奉儉約非矯假也遇

朝賀必飭躬先往恪恭盡道

國主禮遇獨隆事父母無違顏志所交游盡賢達長
者有三原秦大賓以無嗣乞親人之子爲後其子幼
癡遇不良之徒誘引騙去子之父訟宿于邑以爲戕
其子也官捕無獲而兩姓構釁逾年弗已適不良者
領子鬻于公公察其狀貌不類詰得其情呼賓還其
子付不良者于官賓叩首謝以金竟辭不取其敦睦宗

親周給貧乏又作橋梁于申店河以濟往來立集場于王渠鎮以便貿易如此類多不能盡述每教子曰勤儉者起家仁厚者多壽爾小子其勗哉二子嗣徽保業克振宗聲公可謂有後矣嘉靖庚申十月初五日以疾卒壽五十五歲壽不滿德人多惜之公元配夫人孫氏先公卒副室王氏二子長秉樣孫出娶趙氏次秉梓王出娶費氏四女蕭徵韓永輝生員李惟能韓永義皆其壻也孫男三惟結二幼未名樣出孫女一梓出逾十年是爲隆慶庚午二月初四日奉公柩啓韋曲新阡孫夫人壙而合葬焉孫夫人淑行已

勒誌墓中此獨誌人山公也銘曰

猗維人山派衍秦藩俶儻端嚴宗親之賢德厚壽庶人多惜焉韋曲之原巍然新阡寢成孔安百世不遷明秦藩宗室奉國將軍靜菴公元配淑人趙氏

墓誌銘

淑人姓趙氏父玘宦遊於蜀爲樂至主簿母王氏俱咸寧世族弘治庚戌歲十一月十七日寔生淑人天資秀異溫雅端慎不妄言笑弘治丙寅歲十月冬選配奉國將軍靜菴公公乃

高皇帝七世孫

秦愍王六世孫

永興恭憲王曾孫鎮國將軍公鏞孫輔國將軍誠濟之仲子諱秉休淑人榮膺

誥封與靜菴公同心比義克勤克儉安享隆爵厚祿六十餘年奉養豐裕子孫繁夥於今嘉靖乙丑歲十月十一日無疾而逝享壽七十有六訃聞

天子賜祭如制生男子三人俱封鎮國中尉長惟炯配王氏次未名卒三燭配李氏卒繼王氏俱封恭人女六俱封鄉君一曰藁城聘時隆二曰曲周聘孫蕃三曰上黨聘孫祉四卒五曰盤陀聘顏綵六曰瑞雲

聘楊時壻俱封宗人府儀賓孫男七人炯生懷壘配林氏懷堯配張氏繼邵氏懷堦幼卒懷堦配楊氏皆王氏出堦葉氏出堦生懷埃配許氏懷堦配趙氏懷圭尚幼男俱封輔國中尉配俱封宜人孫女五人炯生仙霞配古賢寶泉配王崇女俱封鄉君配俱封宗人府儀賓第三女例封宗女配魏志封宗壻燭生女二長配廖科次配王高皆封宗女宗壻曾孫男五壘生長敬鉉其二其三尚幼堦生一敬釗堦生一尚幼曾孫女三壘生長配周傑次未選女封宗女配封宗壻堦生女一尚幼卜今丙寅歲十二月十一日葬於

咸寧鴻固原父瑩之次余與靜菴公齠歲相識同遊
鄉塾素知淑人之女行婦德母儀嗣系之詳即其富
貴名壽始終無爽可謂世之全福矣乃爲銘曰
猗歟淑人出自名門行潔性純選嬪宗姻協心夫君
壽邁七旬子姓侁侁慶延福殷隆盛無垠阡隴嶙峋
百世如新

明四川茂州吏目希峯張君配碩人仵氏合葬

墓誌銘

君姓張氏諱鯤字大龍別號希峯先世渭南人
國初名道方者始定籍涇陽大石里後幾世有惟信

生子禮禮生斐歷任山東山西巡檢清介慈和素積
陰騭人或稱之即感然曰陰騭如耳嗚人豈知之配
周氏生子魯次即君時惟弘治辛亥十二月十四日
也九歲即善書以功曹入官嘉靖己亥授山西平陸
典史平陸小邑且當晉豫兩省之衝驛使往來繁費
不支值歲歉役苦逃亡過半君惻然自買油燭柴薪
一毫不費里甲人疑矯僞君惟恬然自處復條陳驛
道便宜謂平陸僻處一隅南鄰陝州止隔一河計地
不過五里乞令驛使由陝州徑往夏縣則驛路捷近
公使速達而民困可蘇畫圖貼說力請于晉豫撫按

會兩省皆報允而平陸重苦始息肩矣有識者謂君始舉此有三難焉位卑而情難驟通時久而業難卒變勢大而人難遽從終有四善焉時日不淹而事集公差不擾而牒清關支不煩而財省地里不枉而力均此地方百年之利皆君盡職之良也又時鹽院同分巡高公驀至平陸輒密取里甲私簿及縣官前件見妄費狼藉遂械縣令兩于於獄縣丞趙某越城夜逃君獨恬然自守公私簿內絕無一毫干涉鹽院高公詳詰無跡萬口稱頌心獨異之癸卯歲北虜深入平陽太守雙江聃公檄君繕城耀兵城保無虞後大

臣薦聃公禦虜之功君之力居多也逾年虜復窺晉代中丞石塘曾公檄君據險築城募兵守要建營脩戎器積歲績成曾公疏薦于

朝其畧曰此臣出身雖由吏員治邊優于科第蒙欽賜白金十兩擢四川茂州吏目丙午秋抵任受職即解組以老謝歸徜徉田里時庚戌春携子應昌赴省城謁余余見應昌氣質純雅苦志力學即令與余孫何承勛同受詩于梁先生之門余亦自訓之辛酉秋果登鄉薦君每誨之曰吾志高官卑治不副心尔或賓用王家當恪守官常以補吾素心若拂吾言非

吾子也應昌悚懼守訓每春秋君祭先祖考言淚俱下時年踰古稀而哀慕罔替是亦可謂忠孝兩得矣隆慶己巳春正十四日戌時忽起正衣端坐長逝竟日面猶如生弔者無不驚訝享年七十有九亦可謂上壽考終命矣元配碩人作氏生于弘治庚戌二月初十日天性謹恪不妄笑語事翁姑處妯娌咸得其宜織紉精勤始終無倦見君常公出戒其子曰尔父勤苦如此常言惟有讀書高尔其勉之嘉靖丁未冬疾作呼諸子于前曰尔等成立皆尔父勤勞撫摩善言勿忘吾命至此矣十一月二十日不起丁巳冬葬

于庄北之新塋生子男二長應翔娶蔣氏次應昌舉人娶吳氏女二一適師鑛一適路思公卒孫男子八書典書謨書訓書誥書政書教俱應翔出濟美庠生卒韶美幼俱應昌出孫女子四翔出二一適郝邵一適作聲雷昌出二一字吳命一字秦國士厥嶽蕃矣君繼配王氏無出諸子卜隆慶壬申十一月某日啓作碩人之瘞合君葬焉先期詣予泣拜請銘銘曰維君巖巖豐軀脩髯抱德守謙勤苦是其一命之沾古之孝廉夔屈必伸龍潛自神有子有孫萃於一門巖嶽嶙峋百世永存

碑

大明宗室秦宣王神道碑

大明宗室秦宣王薨奉

勅管理府事隆德王敬

謂棟曰昔我秦府先世諸

王薨逝其嗣子俱爲立碑表於墓道以圖不朽今我父王生子小子奄棄宮闈溘焉長逝罔極之恩終天之痛何能已於予心公與我父王素厚請述其素履之梗槩標諸貞石以訓後世庶予於心少盡矣棟應教義不能辭乃按

王牒

王諱懷 乃

太祖高皇帝八世之孫追封

秦端王之子次妃李氏生王於嘉靖三年十月初六日至嘉靖二十七年二月初九日

冊封爲秦王繼

秦定王之爵王生有異質神清氣粹性敏心靈諸凡技藝一經目即頓悟其妙非人之所能及且履規蹈矩仁慈忠恕聲色貨利一無所好於府西開壽樂園鑿蓮池構竹樓收娶古人圖書經史子集牙籤充棟緗牒盈室時召賢士大夫吟詠倡和棟嘗有魯倍岡

陵人頌福周公吐哺世稱賢之句可以占王之素履
矣隆德王蚤歲封王恐習驕惰每侍立終日厲色莊
容一無假借以故隆德將及而立之歲尤敬畏如一
日謙和溫厚真漢之東平河間諸賢王之流也嫡母
崔妃西城兵馬指揮崔隆女嫡生男子一人敬 女
一人俱未封早卒第一庶長子敬 郭氏生

冊封隆德王妃王氏早薨無出次妃吳氏次庶子一
人未有名封程氏出庶女一人楊氏出孫男二人其
一次妃吳氏出次庶子一人女一人亦吳氏出俱未
有名封嘉靖四十五年八月王漸有疾至初六日王

謂崔妃曰予疾勢增劇天數難逃府事重大未有承
繼嫡子敬鈗不幸早卒庶長子隆德王敬 倫序相
應承襲况本府我

簡祖王先以庶長子

冊封爲鎮安王後以父

惠王薨無嫡子由鎮安王進封爲秦王事例見存乃
力疾強起親書奏稿封付崔妃收備待予薨後具奏
請

勅乞庶長子敬 承襲管理府事葬畢請封越十一
日以疾薨享年四十有二訃聞

上震悼輟視朝三日遣尚寶司少卿陸師道等致祭
謚宣特命有司治喪葬如制在京文武衙門皆致祭
焉嫡母崔妃啓前封具奏下部議覆奉

勅隆德王敬 管理本府一應事務闔府宗儀人等
悉聽鈐束爾其夙夜祇慎正已率人如勅奉行卜以
隆慶元年十一月初九日同

欽賜壙誌葬於咸寧縣鮑陂里鴻固原豐碑大書表
其善行懿德樹之神道百世可考當與終南太乙同
爲不朽矣

祭文

祭大河陽侯文

邇者虜犯京國殘害生民

聖明憂畏宣召舊臣

寵命敦切濫及鄙人星馳趨

命道出孟津虔具牲帛謹告

明神惟乞君臣同志謀猷得伸効功尺寸淨掃胡塵
上谷

皇眷克享

天心

神其鑒之恪守恪遵如或上下乖違進止遭迤抱忠

不售含辭莫陳則當奉身以退早遂歸秦
神其鑒之毋枉毋徇謹

告

祭軍牙六纛文

維

神職司九伐威主五兵萬目觀望衆心仰成近遭虜
患畿甸震驚

朝廷遣將授師出征棟忝司兵政謹修軍容綵旌寶
纛五色相承虜俱遭剋我皆受生方色宜朗號令分
明維

神威行衆將力率諸營除兇勘亂保大定功滅虜狂
逆昭我威靈上祈
神祐俯鑒愚誠尚

享

銘

硯銘

大雅硯

大雅名賢守黑抱玄子孫保之靜以延年

尚書硯

尚書帝車壯於大輶子孫保之仁厚多祿

鐘硯

鐘維虛中藏聲斯洪子孫象之默保成功

鼎硯

鼎壯於足載實公餗子孫象之寬受多福

日硯

日之方升光照四國子孫象之晦以養德

月硯

皎如霽月維弦後盈子孫象之維謙成名

